



EDITORIAL

RAMBAKAN TI MAIKA-34 ANIBERSARYO TI NPA KEN MAIKA-30 ANIBERSARYO TI NDF!

Marso 29, 1969, aldaw ti pannakaitakder ti Bagong Hukbong Bayan wenno New People's Army. April 24, 1973, aldaw ti pannakaitakder ti National Democratic Front of the Philippines (NDFP). Dua a napapateg nga aldaw para kadagiti annak ling-et ken amin a magunggundawayan a dasig. Dua a napapateg nga armas ti Partido Komunista ti Pilipinas ken umili a Pilipino iti panangirussuat ti nailian demokratiko a rebolusyon. Gapu iti pannakaitakder da, ad-adun a balligi ti nagun-od ti masa ken ti rebolusyon. No awan ti Hukbo ken Nagkaykaysa a Prente, saan a pulos nga agballigi ti rebolusyon.



Maituloy iti panid 2

LINAON

1 EDITORIAL

Rambakan ti maika-34
Anibersaryo ti NPA ken maika-
30 Anibersaryo ti NDF!

5 NAGKAYKAYS A PRENTE

5 Ti programa para iti
nawaya a masakbayan

9 Ti 12-punto a programa ti
NDF

10 Dagiti agkakaalyado nga
organisasyon ti NDF

11 AGDAMA A KASASAD

Ti Crocodile Sanctuary ken
Tourist Spot iti San Mariano

13 INTERNASYONAL

Ti panangraut ti US iti Iraq

17 PAMMADAYAW

Ka Brando

19 ARMADO A DANGADANG

Rebolusyonaryo nga Ina

21 AGRIKULTURA

Mainaig iti HYVs ken GMO

23 DAMDAMAG ITI CAGAYAN VALLEY

27 KULTURA

Ababa nga Istorya: Ka Neneng

28 KOMIKS: TANO

NK, Nakaro a Kurad

Ti *Baringkuas* ket maipablaak maminsan
kada dua a bulan. Sisagana nga umawat
dagiti istap ti aniaman a dillaw ken
singasing tapno mapadur-as pay daytoy.

Manipud panid 1

Aldaw met dagitoy ti pananglagip ken pammadayaw
kadagiti martir ken bannuar ti rebolusyon. Ti
panangipaduyakyak iti rebolusyonaryo a taktakderan
ken pannirigan. Ti panangipeksa't pungtot kadagiti
mananggundaway nga agar-ari a dasig. Ken
panangpasingked manen iti petpetpetan a naindasigan
a pannirigan.

Napateg dagitoy a panagrambak iti tengnga ti todo-todo
nga opensiba militar ken saywar ti rehimen US-Arroyo.
Pilit nga iladladawan daytoy a ti CPP-NPA-NDF kano ket
bunggoy dagiti 'terorista.' Desperado nga addangen
dagitoy tapno maisina ti rebolusyonaryo a tignayan iti
masa. Ken ikalintegang ti panangpairteng ti panagatake
iti rebolusyonaryo a pueras ken base a masa. Isardeng
ti tungtongan a kappia ken pasureren dagiti lider
ken negosyador ti NDFP nga idadauluan da Ka Louie
Jalandoni ken ni Prop. Jose Maria Sison. Ti ultimo a
panggep na, isardengen ti armado a pannakidangadang.

Ngem saan a kabaelan a punasen ti aniaman a
panangmarka ken panangawag a "terorista" ti maka-
umili a kagagalad ken aramid ti Partido, BHB ken ti
NDF. Saan na a kabaelan a punasen dagiti nagun-od a
balligi dagiti tignayan masa.

Kalpasan ti tallo a dekada, apay a dungdonguen ken
supsuportaran la unay ti umili dagiti rebolusyonaryo a
puersa iti laksid ti pammarpardaya ken
pammadpadakes ti reaksyunaryo a rehimen?

Gapu ta saan pulos a maliplipatan ti masa ti
panangsalaknib ti BHB ken ti suporta ti nalawa a
nagkaykaysa a prente kadagiti dadakkel ken babassit a
panagtignay da. Sinno kad' pay ti makalipat iti
dangadang da laban iti panangagum ni Danding
Cojuangco ken daydi Gobernador Dy iti Hacienda San
Antonio-Sta. Isabel idi 1979-1982?

Pagyamyamanan unay ti masa daytoy naisangsangayan
a tignayan a masa a nairut nga tinarabayan ti Partido
babaen ti panangitandudo na iti armado a dangadang,
panangirussuat ti militante a tignayan masa ken
panangbukel ti nalawa a nagkaykaysa a prente.

Saan met maliplipatan ti umili dagiti mairusrussuat
nga rebolusyon agraryo ken dadduma a dangadang ti
umili tapno labanan ken mapunas ti nakaro a

pananggundaway. Kas ti panangpadur-as iti kooperasyon, produksyon ken kabiagan ti masa a mannalon. Panangibaba ti abang iti daga, panangibaba ti interes ti pautang, panangingato ti presyo ti produkto ken panangibaba iti presyo dagiti gagatangen nga inputs. Panangitandudo ti karbengan kas tao ken panangipatungpal ti rebolusyonaryo a hustisya. Ken panangpadur-as iti kamulatan a pangpulitika, pangkabuklan nga edukasyon, syensya, kultura, kinadalus ken salun-at ti masa.

Kadagiti sona a gerilya, kakuykuyog ti masa ti BHB iti panagtulong iti panagrisut kadagiti basaran ken inaldaw-aldaw a parikut da. Agpampamulat, agilawlawag kadagiti saritaan, tumultulong iti produksyon, mangbigbig iti kultura ken kinatao da.

Managdungngo, mannakaawat ken managpakumbaba a makilangen kadakuada. Iti panangipatungpal kadagiti patakan, mannakaawat ken mangmangted-espasyo iti benneg ti umili, idinto a nairut daytoy iti kabusor.

Nairut nga itantandudo ti masa ti armado a puersa ti BHB. Dungdungoen ken tumultulong ti masa iti BHB iti trabaho a pangkagimongan a panagsukisok, panagrekluta ti Hukbo, panagorganisa ken panagrekrut iti aktibista, panangilukat ti pagindegan da, boluntaryo a panangited ti makan, lupot ken dadduma pay a pakasapulan. Ken iti panagtulong wenno pannakikuyog kadagiti maniobra a militar, panagtiktik ken iti komunikasyon.

Padpadayawan ti umili dagiti balligi ti NDF, ti naisangsangayan a limed ken konsolidado nga alyansa dagiti basaran a puersa a rebolusyonaryo a mangitantandudo iti baro a demokratiko a rebolusyon babaen ti gubat ti umili.

Pagrebbengan ti NDF nga idur-as ti panagkaykaysa, panagtitinnulong ken koordinasyon ti amin a makaili a dasig, sektor ken puersa. Agpappapigsa daytoy babaen ti panangpapigsa ti tunggal alyado nga organisasyon babaen ti gawaing masa.

Iti kaaw-awayan, pumipigsa ken lumawlaw ti Pambansang Katipunan ng mga Magbubukid (PKM), ti limed a rebolusyonaryo nga organisasyon dagiti mannalon. Manipud iti Grupo a Pang-organisa iti sityo ken purok agingga't pannakabukel dagiti Ganap a Samahan Masa (GSM) iti tukad baryo. Addan signipikante a bilang ti naitakder a GSM iti sumagmamano a konsolidado a lugar a pagtigtignayan ti BHB. Kasta met a naitakderen ti organisasyon ti kabataan, ti Kabataang Makabayan (KM) ken babbai, ti Malayang Kilusan

***Kadagiti sona a
gerilya,
kakuykuyog ti
masa ti BHB iti
panagtulong iti
panagrisut
kadagiti basaran
ken inaldaw-aldaw
a parikut da.
Agpampamulat,
agilawlawag
kadagiti saritaan,
tumultulong iti
produksyon,
mangbigbig iti
kultura ken
kinatao da***

ng Bagong Kababaihan (MAKIBAKA). Naregta nga irusrussuat da ti nadumaduma a tignayan masa, rebolusyon agraryo, panangpaksiat ti malaria, panangsalaknib ti lawlaw ken dadduma pay.

Naitakder met ti selula dagiti akintengnga a puerisa kadagiti baryo, sentro nga ili ken syudad. Umad-adu ti bilang ti maaw-awis nga agtignay manipud iti intar dagiti empleyado ti gubyrno, tao ti simbaan ken relihyoso, masmidya, nalawlawagan a pulitiko ken babassit a negosyante. Napateg la unay ti papel da iti panangipasaknap ti nailian-demokratiko a linya, ken panangaramat ti suporta para iti armado a dangadang kas kangrunaan a langa ti dangadang.

Bigbigen ti umili ti rekord ti NDF iti negosasyon para iti nainkalinteg kan pangmabayagan a kappia ken talna a nakabasar iti linya ti nailian demokratiko a rebolusyon iti laksiad ti adu a palpalikaw ken lapped nga inkeddeng ti reaksyunaryo a gubyrno.

Nairut a pagig-iggeman ti NDF a saan a posible ti pangmabayagan a kappia ken panagsardeng ti labanan no awan ti magun-od ti umili a komprehensibo a katulagan iti karbengan kas tao ken dagiti reporma iti gimong ken ekonomiya, ken dagiti reporma iti pulitika ken iti konstitusyon. Ken no awan ti pannakarisut dagiti basaran a problema ti umili.

Gapu iti NDF, lumawlaw ti lumalaok ken sumupsuporta iti rebolusyonaryo nga armado a dangadang. Manipud kadagiti nadumaduma a sektor iti pagilian. Saan laeng kadagiti mangmangged, mala-mangmangged ken mannalon, no di karaman ti dadduma pay a sektor kas ti nailian a minorya, manursuro, propesyunal, kabataan ken estudyante, empleyado ti gubyrno ken dadduma pay.

Napapateg met dagiti nagun-od ti NDF iti pannangibagi na iti rebolusyonaryo a tignayan kadagiti nadumaduma nga internasyunal a panagtitiyon. Kasta met iti pannakirelasyon kadagiti organisasyon ken institusyon. Mabigbig met ti papel daytoy iti nairut a panangsuppiat iti panangraut ti US iti Iraq. Ken panangbukel ti nalawa nga prente nga anti-imperyalista iti intero a lubong.

Gapu iti trabaho ti NDF, mabigbig ti lehitimo a tarigagay ken trabaho ti rebolusyonaryo a tignayan iti Pilipinas ken ti *status of belligerency* wenno panangbigbig daytoy kas maysa a lehitimo a puerisa a mannakigubat nga addaan bukod a bileg pampulitika, hukbo ken teritoryo.

Ti nalawa a pammadayaw ken panagsuporta nga aw-awaten ti NDF ket kalasag laban kadagiti gandad ti imperyalismo ken reaksyunaryo nga estado a paayen ti nailian demokratiko a rebolusyon.



Kas panangbigbig iti nalawa a panangitandudo ken panagsuporta ti umili, paspasingkedaan ti intero a rebolusyonaryo a tignayan nga idadaulan ti Partido a pairtengen ti armado a pannakidangadang, patibkeren ti nagkaykaysa a prente ken iyabante pay ti tignayan masa agingga't magun-od dagiti basaran a tarigagay para iti pangpagilian ken pangkagimongan a wayawaya. **B**

TI PROGRAMA PARA ITI NAWAYA A MASAKBAYAN

Ti programa iti panagtignay dagiti alyado nga organisasyon ken indibidwal ti National Democratic Front ket naipauneg iti maymaysa a kabuklan a panggep—ti panangitakder ti baro a gimong a Pilipino



“Para kadagiti reaksyunaryo ken ideyalista, ti pannakaputar ti baro a gimong ket lalaisen da nga ‘arapaap’ kano laeng,” pananglukat ni Ka Sening, maysa nga NPA. Agad-adal dagiti kameng ti grupo ti Pambansang Katipunan ng Magbubukid (PKM) iti Baryo Ubog mainaig ti 12-punto a programa ti NDF. Ti PKM ti limed a rebolusyonaryo nga organisasyon dagiti mannalon.

“Nalaes kanon a teorya ti Marxismo-Leninismo-Maoismo. Bimmagsak kanon dagiti sosyalista a pagilian kas pammaneknek,” kuna na.

Ngem saan nga arapaap ti sosyalismo. Daytoy ket sistema ti gimong a natural a papanan ti gimong a malakolonyal ken malapyudal. Ta ti turungen ti maysa a bulok a sistema ket ti pannakarippuog daytoy tapno masukatan ti maysa a baro a sistema.

Ta nu ti masa ti mangngeddeng a baliktagen ti lubong, maipagballigi na ti tarigagay a punasen ti pananggundaway!

Nagkaykaysa nga umili

“Babaen laeng ti panagkaykaysa a makabukel ti pigsa. Saan kad’ a masagadan laeng ti rugit no nagtitipon dagiti iit ti sagad?,” saludsod ni Ka Sening.

Umuna a panggep ti NDFP ti panagkaykaysa ti amin nga umili tapno marippuog ti agdama a bulok a gimong. Sinno ti pagkaykaysaen? Isu dagiti mangmangged ken mannalon a bumukbukel ti 90% ti populasyon.

Kasta met a maisilpo ti pigsa ti intar dagiti petiburgesya ken nailian a burgesya a makarikna met laeng ti pannakagundaway. Iti met intar dagiti agar-ari a dasig, gundawayan tayo dagiti bumtak a risiris iti nagbabaetan da.

Ti gubat ti umili nga irusrussuat tayo ket babaen ti estratehiya a panagkubkob ti syudad manipud iti kaaw-awayan. Agurnong tayo ti naan-anay a pigsa tapno makaagaw ti bileg a pampulitika a nakaramut iti syudad.

Tapno sigurado ti balligi, masapul ti natalged a panangidaulo ti Partido Komunista ti Pilipinas. No awan ti Partido, saan a magun-od ti panggep a panangrippuog ti agdama a malakolonyal ken malapyudal a sistema.

Demokratiko a gubyrno ti umili

“Isagsagana met ti NDF ti pannakaitakder ti Demokratiko a Gubyrno ti Umili,” palawag ni Ka Sening.

Nagdamag ni Ka Aris, maysa a mannalon. “Kasano nga isagana ti pannakaitakder ti gubyrno tayo?

“Babaen ti maurnong a pigsa dagiti alyado na nga organisasyon ken amin a demokratiko a sektor iti pagilian,” sungbat ni Ka Sening. “Mabukbukel itan iti kaaw-awayan dagiti organo ti bileg a pampulitika. Aglalo dagiti organisasyon ti basaran a masa kas ti Pambansang Katipunan ng Magbubukid sa Pilipinas wenno PKM. Dagitoy ti bin-i ti gubyrno a ragragpaten ti NDF a mabukel.”

“Ket no balligin, ania ngata met ti langa ti gubyrno nga itakder tayo, kadua?,” damag manen ni Ka Aris.

“Syempre,” pannakilaok ni Ka Berto, a kagrupo na, “baliktad iti agdama a gubyrno ni Gloria, a!”



“Apaman a balligi, maitakder ti gubyrno a koalisyon a buklen ti amin a demokratiko a pwersa iti pagilian. Panggep daytoy ti napartak a panagbangon ti pagilian para iti sosyalista a konstruksyon kalpasan ti pannakadidigra iti mapasamak a gubat.

“Mabigbig ti awtonomiya dagiti Moro, umili ti Cordillera ken dadduma pay a nailian a minorya iti pagilian a mangtartarigagay iti

karbengan iti bukod a pangngeddeng.

“Ti mabukel a gubyrno ket addaan konsulatibo a kagagalad babaen ti pannakabukel ti maysa a konsulatibo a konseho. Mailatangan ti apagkatlo (1/3) ti mangibagbagi iti Partido, basaran a masa ken dagiti akintengnga a pwersa. Kayat a sawen, maaddaan partisipasyon ti amin a demokratiko a pwersa iti panagtaray ti gubyrno,”

palawag ni Ka Sening.

Ken sigsiguradoen ti baro a gubyrerno a maaddaan ti boses dagiti basaran a masa, innayon ni Ka Sening.

“O, dayta ti maysan a nagdumaan na iti gubyrerno ni Gloria!” kuna ni Ka Berto. “Makonsulta ti umili iti amin a desisyon ti gubyrerno. Saan da a sumrek iti aniaman a tulagan, wenno mangipatungpal ti aniaman a programa, a makita tayo a saan a para iti pagsayaatan!”

“Wen,” sungbat ni Ka Sening. “Panggep met ti NDF ti pananggibus iti amin a bangbangir a katulagan ken patakaran a sinerrek ti reaksiyunaryo a gobyerno. Mairaman kadagitoy dagiti linteg ken programa a manglablalsing iti soberanya ti Pilipinas. Ken mangiluklukat kadagiti rekursu ti pagilian para iti interes dagiti ganggannaet nga imperyalista.

“Kas kuma ti linteg a mangpalubos iti panagitakder kadagiti base militar ti US. Ti patakaran iti liberalisasyon ken deregulasyon. Ken dadduma pay,” kuna na.

Isu a maitandudo met ti programa ti aktibo ken nainkappiaan a patakaran iti pangruar a relasyon iti sabali a pagilian ken umili dagitoy. “Makilangen tayo kadagiti dadduma a pagilian ken gubyrerno, ngem saan tayo nga itulok a gundawayan da tayo,” kuna ni Ka Sening.

“Mabalin nga ikkaten iti poder ti siasinnoman a daulo a

saan a mangipatungpal ti rebbengen na,” intuloy na.

“Agtalinaed met ti papel ti Pangukuman ti Umili a mangusig kadagiti kaso ken mangted pannusa basar iti kadagsen ti krimen dagiti nagbasol. Malimitaran ti karbengan iti ekonomya ken pulitika dagiti aggapu iti mananggundaway a dasig. Daytoy ket tapno masigurado a saan da a makaggundaway manen.”

Panagpapigsa ti NPA

“Ti NPA ti kangrunaan nga organisasyon a mangipatungpal iti rebbengen iti panangagaw ti bileg a pampulitika, iti panangrippuog ti agdama nga estado babaen ti rebolusyonaryo a ranggas.

“Isu a rumbeng a papigsaen ti nagkaykaysa a prente ti NPA ken salakniban ti demokratiko a gobyerno ti umili,” intuloy ni Ka Sening.

“Tapno masigurado ti panangipatungpal ti NPA kadaytoy a rebbengen, kasapulan ti panangidaulo ti Partido Komunista. Iti kastoy, pulitika ti nangruna ngem paltog!”

Ti NPA ti kangrunaan nga organisasyon a mangipatungpal iti rebbengen iti panangagaw ti bileg a pampulitika, iti panangrippuog ti agdama nga estado babaen ti rebolusyonaryo a ranggas.

Tinalakay da met ti linaon pay ti programa ti NDF panggep ti modernisasyon ti agrikultura ken panangitandudo ti ekonomya a makasuporta iti bukod. Babaen ti nasyunalisasyon ti daga iti pagilian apaman balligi, maikkan basaran ti modernisasyon ti agrikultura.

Iti maksimum, maiwaras ti daga kadagiti mannalon tapno sukayen dagiti agkurkurang wenno awanan-bukod a daga.

“Ti irusrussuat tayo ita, ti minimum pay laeng a panggep ti agraryo a rebolusyon,” bingay ni Ka Aris. “Paset pay amin daytoy ti panangpakapsut ti bileg dagiti apo’t daga iti kaaw-awayan.”

Gubyrerno para iti umili

“Lalaonen ti programa ti NDF ti pananggun-od kadagiti pagsayaatan ti umili, nga isawsawang ti reaksiyunaryo a gobyerno ngem lablalsingen da iti aramid. Karaman ditoy ti panangitandudo kadagiti karbengan dagiti umili nga

agbiag,
makabirok ti
trabaho,
nawaya nga
agsao, ken
agbukel ti
organisasyon.

“Mabigbig
ti karbengan iti
bukod a
pammati,
panagbotos,
edukasyon,
serbisyo iti
salun-at ken
partisipasyon
iti
panaggubyrerno.
Dagiti
karbengan ti
ubbing, mangmangged ken
babbai,” kuna ni Ka Seling.

“Ay, rumbeng laeng!,”
kuna ni Ka Bulan, maysa a
baket iti grupo da. “Ta ti
babbai nga anakling-et ket
makasagsagrap ti nakaro a
pannakairurumen!”

Iti agdama, maibingay
dagiti rebolusyonaryo a
puersa iti kaaw-awayan ti
sumagmamano a serbisyo
sosyal. Babaen kadagiti
kampanya nga irusrussuat iti
panagbasa ken panagsurat.
Kampanya iti kinadalus ken
panangliklik ken panangagas
iti nasasaknap a sakit ti
umili. Ken kampanya iti
produksyon ti umili.

Siguraduen ti baro a
gobyerno a maipangruna nga
agbenepisyo iti serbisyo sosyal
dagiti umili. Saan a kas iti
reaksyunaryo a gobyerno, a ti

**“Mabigbig ti
karbengan iti
bukod a pammati,
panagbotos,
edukasyon,
serbisyo iti salun-
at ken
partisipasyon iti
panaggubyrerno.
Dagiti karbengan
ti ubbing,
mangmangged
ken babbai,” kuna
ni Ka Seling.**

interes dagiti saan a
makatrabaho gapu iti sakit,
edad wenno diperensya iti
pammagi. Masalakniban ti
karbengan dagiti ubbing.
Maaddaan ti pannakarisut ti
kasasaad dagiti naigamer iti
panagusar ti maiparit nga
agas, agkatang-katang ken
ulila. Ti kasasaad dagiti pros-
titute, dagiti biktima ti
sekswal a pananggundaway,
ken dagiti inna nga awanan
assawa,” kuna ni Ka Seling.

“Wen, a!,” bigla a sungbat
ni Ka Kardo, maysa kadagiti
agad-adal. Agtutubo a
mannalon, isu ti agak-akem ti
rebbengen kas medikal iti
grupo da. “Ta dagita a
problema ket timmaud iti
bulok a gimong. Iti itakder
tayo a baro a gimong, punasen
tayo dagiti basaran ti
panagtaud dagitoy.”

bassit a
maituding para
iti pagsayaatan
ti umili ket
mapan pay iti
bursa dagiti
opisyal. Wenno
mailatang para
iti panagbayad ti
utang ti
pagilian, wenno
badyet ti
reaksyunaryo
nga armado a
pwera.

“Iti uneg ti
baro a gimong a
ragragpaten
tayo, maikkan
atensyon ti

Rebolusyon a pangkultura

Ken sigsiguradoen ti baro
a gubyerno a maaddaan ti
boses dagiti basaran a masa.

“Maikkan ti talmeg ti
programa iti kultura gapu ta
nabayagen a panawen a
naipasaknap ti kultura dagiti
agari-ari a dasig ken dagiti
imperyalista. Ti kultura a
bulok ken agserserbi iti
interes da a sumagmamano,”
kuna ni Ka Sening.

Waknitan ti
rebolusyonaryo a pangkultura
ti kapanunotan ti umili
manipud ti kinaignorante,
dagiti saan a siyentipiko a
pammati a mangitantandudo
kadagiti kapanunotan nga
agserserbi para iti
panagtalinaed ti bulok a
gimong.

“Wen,” kuna ni Ka Aris.
“Kas ti kapanunotan nga
anusan tayo ti kinarigat, a
saan tayo a lumaban!”

“Ken ti kapanunotan a ti
kasasaad tayo a marigrigat
ket saanen a mabaliwan
pay!,” nayon ni Ka Bulan.

Dimmanon ti pulong
panagadal agingga iti rabii.
Kalpasan na, nanayunan
manen ti kaamuan dagiti
mannalon.

“Isu a lumawlaw a ken
pumigpigsa ti intar tayo!,”
panagserra ni Ka Sening.
“Iggem tayo ti programa iti
panagtignay a
mangitantandudo iti interes ti
kaaduan!” **B**



12-Punto a Programa ti NDF

- 1** Pagkaykaysaen ti umili a Pilipino ken ipatungpal ti nailian-demokratiko a rebolusyon tapno marippuog ti malakolonyal ken malapyudal a sistema, babaen ti gubat ti umili.
- 2** Isagana ti panangitakder ti Demokratiko a Republika ti Umili ken Demokratiko a Koalisyon a Guberno.
- 3** Papigsaen ti Baro a Buyot ti Umili ken ti sistema ti depensa ti umili.
- 4** Itandudo ken iyabante ti demokratiko a karbengan ti umili.
- 5** Gibusan amin a bangbangir a katulagan iti US ken dadduma pay a ganggannaet.
- 6** Ipatungpal ti pudno a reporma iti daga, itandudo ti agrikultural a panagtitinnulong, ipangato ti produksyon ken trabaho iti kaawayan babaen ti modernisasyon ti agrikultura ken industriyalisasyon iti kaawayan. Siguraduen ti agrikultura a makasuporta iti umili.
- 7** Rippuogen ti panagari ti US ken dadduma pay a bileg nga imperyalista, dadakkel a kumprador-burges ken apo't daga iti ekonomya. Ipatungpal ti nailian nga industriyalisasyon ken itakder ti nawaya ken nakasanggir-iti-bukod nga ekonomya.
- 8** Ipatungpal ti amin-a-benneg ken progresibo a patakaran a pangkagimongan.
- 9** Itandudo ken padur-asen ti progresibo ken pangmasa a kultura.
- 10** Itandudo ti karbengan iti demokrasya ken bukod-a-pangngeddeng dagiti Bangsa Moro, umili ti Cordillera ken dadduma pay a nailian a minorya.
- 11** Iyabante ti rebolusyonaryo a panangwayawaya iti babbai iti amin a tay-ak.
- 12** Itandudo ti aktibo, independyente ken nainkappiaan a patakaran iti internasyunal.

DAGITI REBOLUSYONARYO NGA AGKAKAALYADO NGA ORGANISASYON TI NDF



Communist Party of the Philippines (CPP) – kameng ti NDF a mangibagbagi iti proletaryado ken amin a rebolusyonaryo a Pilipino; isu ti mangidadaulo iti pangkabuklan a rebolusyon a Pilipino



New People's Army (NPA), Marso 29, 1969 - kangrunaan nga organisasyon iti panangipatungpal ti rebbengen iti panangagaw ti bileg a pampulitika



Pambansang Katipunan ng mga Magbubukid (PKM) – limed nga organisasyon dagiti rebolusyonaryo a mannalon ken mangmangged-talon



Revolutionary Congress of Trade Unions (RCTU) – limed a kumpederasyon dagiti radikal nga unyon dagiti mangmangged



Katipunan ng mga Samahang Manggagawa (KASAMA) – limed a pederasyon dagiti asosasyon dagiti mangmangged a nakaipaunegan dagiti malaproletaryado, mangmangged ken awan panggedan a nakabase kadagiti komunidad ti marigrigat iti syudad.



Kabataang Makabayan (KM), Nobyembre 30, 1964 – limed nga organisasyon dagiti rebolusyonaryo a kabataan



Malayang Kilusan ng Bagong Kababaihan (MAKIBAKA), 1972 – limed nga organisasyon dagiti rebolusyonaryo a kababaihan



Christians for National Liberation (CNL), Feb. 17, 1972 – limed nga organisasyon dagiti rebolusyonaryo a tao ti simbaan. Aktibo a nakikoopera iti PKP ken NPA a buklen ti NDF Preparatory Commission idi April 24, 1973



Katipunan ng mga Gurong Makabayan (KAGUMA) – limed nga organisasyon dagiti rebolusyonaryo a manursuro



Makabayang Samahang Pangkalusugan (MSP) – limed nga organisasyon a rebolusyonaryo iti sektor ti salun-at



Cordillera Peoples' Democratic front (CPDF) – rebolusyonaryo nga organisasyon dagiti umili ti Cordillera



Liga ng Agham para sa Bayan (LAB) – limed nga organisasyon dagiti rebolusyonaryo a siyentista



Artista at Manunulat para sa Sambayanan (ARMAS) – limed nga organisasyon dagiti mannaniw, mannurat, pintor ken dadduma pay nga artista



Lupon ng mga Manananggol para sa Bayan (LUMABAN) – limed nga organisasyon dagiti rebolusyonaryo nga abugado



Moro Revolutionary Organization (MORO) - limed nga organisasyon dagiti rebolusyonaryo nga umili a Moro

LUMAD – limed nga organisasyon dagiti rebolusyonaryo a nailian a minorya a saan a Moro iti Mindanao

Crocodile Sanctuary ken Tourist Spot Project

Saan a panagdur-as no di kinarigat

Panagdur-as kadi ti maited daytoy nga ekoturismo a proyekto no mapatakkias dagiti agindeg ken agsuksukay iti daga iti lugar?

“Panangpadur-as” kano ti ekoturismo a proyekto ti gobyerno a Crocodile Sanctuary, lugar a pagnaedan ken pagpaaduan ti buwaya iti ili ti San Mariano, Isabela.

Ti proyekto ket maipatakder babaen ti panagpondo dagiti gangannaet nga NGO kas ti Melbourne Zoo ti Australia, Fauna and Flora International Great Eastern House ken Whiteley Awards Foundation ti United Kingdom. Pannakitulag ti Provincial Environment and Natural Resources Office (PENRO), DENR Region 2 ken ti lokal a gubyrno ti San Mariano, Isabela.

Ti ipatakder a santuaryo ket pagnaedan dagiti *Crocodylus mindorensis*, wenno buaya, a ti puli ket asidegen a maibus ditoy pagilian. Maitakder dagiti santuaryo kadagiti baryo ti Disulap, San Jose ken Cadsalan.

Iti Cadsalan, adda ti naikeddeng a 150-ektarya nga inaladan a santuaryo kas lugar a pagnaedan ken pagpaaduan kadagitoy.

Pagbalinen da metten daytoy a pagpasyaran ti turista. Makaala dagiti gangannaet ken lokal a gubyrno ti dakkel a ganansya manipud iti panagsingir ti *entrance fee* kadagiti agpasyar. Mangipatakder da met kadagiti *souvenir shop*, *restaurant*, *hotel* ken dadduma pay.



Dummakel kano ti pastrek a kita ti ili ti San Mariano. Masalagniban pay ti puli dagiti buaya. Mapasyar dagiti turista ti ili tayo. “Daytoy ti rugin ti panagdur-as ti San Mariano!” kuna pay ti mayor ti nasao nga ili a ni Jesus Miranda. Apay ngarud a supsuppiaten dagiti mannalon ti proyekto?

Panangagaw ti daga

Ti damo a masakup nga 150-ektarya a daga a pakaitakderan ti santuaryo ket sumakop kadagiti kataltalunan dagiti mannalon ken 38 a pamilya nga agnanaed iti So. Dinang, Cadsalan, San Mariano.

Daytoy ket daga a nabayag dan a suksukayen ken pinadur-as. Isu ti kangrunaan a pagpagapuan ti makan ken dadduma pay a kasapulan dagiti umili sadiay. No matuloy ti proyekto, mapatalaw da

manipud kadagiti taltalon, piskarya ken mismo a balbalay da.

Pangawis a kari ti lokal a gubyrerno ti San Mariano ti mapataud a trabaho para kadagiti mannalon. Sumrek da kano kas mangmangged kadagiti maipasdek a restawran ken dadduma pay nga establisimyento.

Ngem ania ti panagdur-as nu mapatalaw dagiti mannalon? Saan a pannakitegged ti kangrunaan a kasapulan da. Ti karbengan iti panagtagikua iti daga ken panagsagrap iti bunga ti nagbambannugan a daga ti dawdawaten da.



Sagrapen to dagiti mannalon nga agbalin kas mangmangged ti pannakagundaway. Bassit to ti ipasueldo dagiti kapitalista laksid pay nga awan talged ti panagtrabaho da.

Tapno maaywanan dagiti buaya, malablabasing dagiti karbengan ti umili ti Cadsalan ken magungundawayan da.

Maiparit ti aglaba ken agbatok iti waig, pati agkayo iti lugar nga asideg iti pagnaedan dagiti buaya!

Dagiti mannalon ti mapatalaw kadagiti dagdaga da, para iti interes ti ganggannaet a kapitalista. Tapno masigurado ti daga a pagnaedan dagiti buaya, apay a kasapulan nga agpeggad ti pagnaedan dagiti tattao?

Dagiti buaya ket makedngan ti gobyerno ti 150 ektarya. Idinto nga agingga ita, kaaduan

dagiti mannalon ket agtaltalinaed nga awanan wenno agkurkurang ti bukod a daga a masukay.

Ipateg ti gubyrerno ti panangsalaknib kadagiti buaya. Idinto a dagiti Kalinga, a nanglukat ken nagpadur-as iti daga iti Cadsalan, ket puli a bumassit met laengen ket masapul met a masalakniban. Iti aktwal, mapapaidaman da kadagiti serbisyo sosyal a pagrebbengan koma nga ited ti gubyrerno kanyada.

No saritaan ti panangipateg iti tao ken buaya, saan met a rumbeng nga isakripisyo ti maysa kadakuada tapno maisalakan ti maysa pay. Ngem para ngamin iti reaksiyunaryo a gubyrerno, maymaysa ti napateg: ti dakkel a kuarta a pastrek a kurakoten da!

Panangallilaw ken panangranggas

Ti proyekto iti ekoturismo ket idurduron ti Plan International, maysa nga ahensya nga ar-aramaten ti Central Intelligence Agency iti kontra-rebolusyon. Pangallukoy da kadagiti mannalon ti pannakaikabit kano ti kuryente ken ti panangpasayaat ti dalan iti baryo no matuloy ti proyekto. Ti Plan International ket agpampamarang a mangitantandudo kadagiti proyekto a pagnamayan kano ti umili. Ngem panggep da a patalnaen ti panaglaban ti umili ken iyadayo ida iti dalan ti rebolusyonaryo a panaglaban.

Tapno saan a makapagkedked dagiti mannalon, usaren dagiti kapitalista ken ti gubyrerno ti AFP. Ita pay laeng, dagiti soldado ti 45 IB ti masansan a kakuyog da nu mapan iti baryo. Adda met pakainaigan na iti proyekto ti panangitakder ti kampo ken panagrekrut ti CAFGU kadagiti baryo iti lawlaw ti Cadsalan. **B**



ITI NAGAN TI LANGIS

Panangraut ti US iti Iraq

ITI 22 ALDAW a panagraut ti US iti pagilian nga Iraq iti gandat na a sakupen daytoy, makita ti kinaranggas ken desperasyon ti imperyalismo tapno maitantan ti pannakarippuog daytoy babaen ti panagkontrol kadagiti nakakapsut a pagilian.

Idi umuna a lawas ti Abril, 255 a tropa ti US ti natayen, 92 ti mapukpukaw, 785 ti sugatan ken 15 ti natiliw dagiti Iraqi. Natay met ti 1,460 soldado ti Iraq, 800 ti sugatan ken 985 ti natiliw dagiti Allied Forces (nagtipon a puersa ti US ken Britain).

Dumanon iti 250,000 ti bilang dagiti soldado a rimmaut iti Irag. Ipambar ti US a salakniban ken wayaan da ti umili ti Iraq manipud iti panagari ti presidente sadiay a ni Saddam Hussein, nga agilemlemmeng kano kadagiti armas a mausar iti nasaknap a panangdidigra.

Nangayab ti US ti tulong dagiti pada na nga imperyalista a bileg. Uray iti intar dagiti imperyalista, nagkedked a sumuporta ti sumagmamano a pagilian kas ti France ken Germany gapu iti nasaknap nga anti-gera a tignayan iti bukodda a pagilian ken iti intero a lubong. Limmaok iti mapangraut a gera ti pagilian a Britain.

Inaramat ti Presidente ti US a ni George Bush ti “anti-terorismo” a kampanya tapno ikalintegangan ti panagraut da. Ti met rehimen ni Presidente Gloria Macapagal-Arroyo ket simmuporta iti among na nga imperyalista. Maysa isuna kadagiti aso-aso ti US a direkta a simmuporta iti makaayup a gubat ti US.




Maysa nga ubing nga Iraqi a biktima ti panagraut ti tropa nga Amerikano iti Baghdad

Ti pudno a rason

Panagkontrol iti natural a kinabaknang ti Iraq ti pudno a rason iti likod ti panangraut ti US iti Iraq. Ti Iraq ti maikadua a pagilian iti intero a lubong a kababaknangan iti suplay ti langis. Kayat ti US a makontrol ti suplay ti langis saan laeng iti Tengnga a Daya (Middle East) no di iti intero a lubong. Tapno magunod daytoy a panggep, nauyong a nilabsing ti US ti soberanya ti pagilian nga Iraq.

Ti US ti napaneknekan a pudno a terorista. Nasagrap ti umili ti Iraq ti nakaamames a kasasaad gapu iti panangraut na. Awan sarday ti panagatake dagiti Allied


(Maituloy iti panid 16)



NUMERO UNO A TERORISTA TI LUBONG,
PRESIDENTE TI US GEORGE BUSH



UMILI NGA IRAQUI KONTRA ITI AGRESYON TI US



UMILI NGA AUSTRALIANO ITI SYUDAD
TI MELBOURNE, KONTRA ITI GYERA A
SINUPORTAAN NI PRESIDENTE HOUARD



UMILI NGA AMERIKANO NAGRALI ITI WASHINGTON DC,
KONTRA ITI IRUSRUSUAT NI BUSH A GYERA




IMPEKSA DAGITI UBBING A PILIPINO: *ISARDENGEN TI GYERA!*



BAYAN: *ISARDENG TI IMPERYALISTA NGA AGRESYON ITI IRAQ!*

**DAGITI RALI KONTRA ITI
PANANGRAUT TI US ITI
IRAQ ITI MANILA**



BIKTIMA TI RANGGAS-MILITAR
TI HAPONES IDI MAIKADUA A
GUBAT TI LUBONG: *SUPPIATEN
TI IMPERYALISTA NGA
AGRESYON!*

Forces iti uneg ti 22 nga aldaw. Idi Abril 5, intinnag da kadagiti ili ti Iraq ti 725 Tomahawk Missiles, 50 a Cluster Bombs (wenno bomba a naglaon ti rinibo a babassit a bomba nga agwaras ken bumtak iti adu a lugar) ken 12,000 precision missiles.

Nabomba uray dagiti imbakan ti taraon dagiti tao iti ili ti Basra, abagatan ti Iraq. Kasta met ti pasilidad nga agsupsuplay ti mainom a danum. Nasurok 1.5 milyon a tao ti napaidaman ti danum.

Adu nga ubbing ti natay manipud iti awan-pilpilien a panagbomba ti US. Idi Abril 5, inrussuat da ti 18 a daras a misyon iti panagbomba. Tunggal oras, nasurok sangagasut a tao ti nasugatan a maiserrek iti ospital. Nabisinin ti 17 milyon nga umili gapu ta saan a dagus a nakasangpet ti tulong a taraon para kanyada. Adda iti peggad nga agburis ti 200,000 ubbing kadaytoy a panawen.

Malaksid ditoy, simmaknap ti panagpaltog kadagiti umili kadagiti tsekpoynt nga intakder dagiti mapangraut. Iligal a sinerrek da dagiti balbalay. Iligal a naaresto dagiti uray awan basol na a lallaki a maatap a lumaban iti US. Naperdi dagiti balbalay, ospital, rangtay ken adu pay a pasdek iti Iraq.

Adal manipud iti pannakidangadang

Nilabanan dagiti umili ti Iraq ti panagsakup ti US. Uray nakapsut dagiti armas ken basbassit da kumpara iti puersa dagiti imperyalista, simmango dagiti soldado ti Iraq ken nagarmas a masa sadiay.

Kasta met a nasaknap ti tignayan masa a nagprotesta iti panagraut ti US. Inaldaw nga adda ti mairussuat a tignay protesta kadagiti ili ti Iraq. Iti dadduma a paset ti lubong, minilyon nga umili ti nagprotesta laban iti imperyalista a gera.

Maadaw nga adal manipud iti kapadasan ti Iraq ti sumaganad:

1. Natibker a nilabanan ti gubyrno ni Saddam Hussein ti pannakibiang ken

agresyon ti imperyalismo nga US iti uneg ti 12 a tawen. Saan a simmuko daytoy. Ngem saan na a nariing ti mananglaban a rikna ti ad-adu pay nga umili tapno mabukel ti nailian a depensa;

2. Iti panaglaban iti US, nagbuis ti biag ti adu a soldado ken umili. Nagkurang laeng ti Iraq iti nalawa ken natibker a pangmilitar a depensa, a nagaramat koma ti nagkuyog a pigsa dagiti regular a tropa, milisya ken naarmasan a sibilyan iti kombinasyon ti regular ken gerilya a pannakidangadang;

3. Nasaknap ken adu ti nairussuat nga ispontanyo a panagtignay. Ngem saan nga organisado ken awan nangidaulo kadagitoy. Naiturong koma ti naparang a tignayan ti masa laban kadagiti manangsakup. Naikombina koma daytoy iti armado a pannakidangadang;

4. Inaramat ti US ti mapanggudua a taktika. Dagiti sigud a risiris iti pammati ken etnisidad iti Iraq ket rinubruban na tapno mapakapsut ti panaglaban dagiti Iraqi. Rumbeng a napagkaykaysa koma dagiti grupo a laban iti rehimen ni Hussein para iti maymaysa ken kapapatgan a panggep—labanan ti panagsakup ti US ken salakniban ti pagilian nga Iraq;

5. Maisigurado laeng ti panagballigi ti dangadang laban iti imperyalista a panagraut no adda ti rebolusyonaryo a proletaryado. Isu ti makabael a mamagkaykaysa iti umili, idauluan ti rebolusyonaryo a tignayan ken iturong ti laban para iti panangsalaknib iti pagilian.

Agtultuloy a laban

NAABAK TI IRAQ iti gera ngem saan pay a nalpas ti anti-imperyalista a pannakidangadang dagiti umili sadiay. Agtultuloy ti nagprotesta da laban iti intakder ti US a baro a kolonyal a gobyerno. Ita ta nasakup na ti Iraq, sigurado a kumaro ti pannakagundaway ken pannakairurumen ti umili. Awan sabali a turungen da no di ti dalan ti anti-imperyalista a pannakidangadang. **B**



KA BRANDO

Pagwadan a Rebolusyonaryo

“Ti mangibukbok ti dara para iti pagilian ket saan a malipatan inton kaanuman; agbalin a baton-lagip ti agdama ken masanguanan”

Naadaw daytoy iti pammadayaw ni Ka Vic Balligi, tagapagsarita ti Reynaldo Piñon Command ti New People’s Army, para kenni Ka Brando

Iti nagan ti Reynaldo Piñon Command, idanon mi ti inkam pannakipagladingit iti ipatpateg a pamilya ken dagiti nasinged a gagayyem ni Ka Brando.

Ni Ka Brando ket mannalon a taga-Mabbayad, Echague, Isabela. Maysa kadagiti rinibu nga agtutubo a naibilang iti grupo ti nailian a minority a Kankannaey.

Saan a narigat para kanyana ti panagdesisyon nga agarmas tapno wayaan ti bukod ken ti intero a kadasig na a magungundawayan. Nakadakkelan na ti pananggundaway dagiti apo’t daga nga usurero iti baryo da. Naipaidam kanya na ti panagbasa iti burges nga eskwelaan ket nasapa a naigamer iti trabaho iti daga. Kakuyog na ti rigat kas mannalon; tarigagay na ti wayawaya kas rebolusyonaryo.

Situtured ken naimpapusuan na a sinurot ti dalan ti pangmabayagan a gubat ti umili. Kinayat ni Ka Brando nga iserbi ti kabaelan, pigsa ken uray ti biag na para iti nalawa nga umili a marigrigat ken magungundawayan. Saan na a sinamir ti rigat ken sakripisyo tapno mawayaan ti dalan nga agturong iti naraniag a masakbayan—iti pudno a wayawaya ken demokrasya.

Ammo mi a nasakit a panunoten a pumusay ti maysa nga anak. Nangruna kadakayo a kapamilya ni Ka Brando. Kasta met kadakami a nakadua ken nakakolektibo na iti panangirussuat ti rebolusyonaryo a trabaho, iti armado a dangadang.

Saan a nakalapped iti panagtignay na ti pisikal a limitasyon. Uray no ampit ti maysa a braso na, naregget latta ni Ka Brando a nangipatungpal kadagiti inaldaw-aldaw a trabaho. Ken kadagiti indibidwal a rebbengen na kas mannakigubat ti NPA ken kameng ti Partido.

Imbati na kadagiti kakadua ken masa ti saan a mabayadan a bingay na iti

panagdur-as ti rebolusyonaryo a tignayan—iti panangpangato ti tukad ti kaamuan pampulitika, pang-organisasyon ken pangkultura ti masa, iti panagpatignay kadakuada iti nailian-demokratiko a rebolusyon.

Kadagiti lugar a nagtignayan ni Ka Brando, makita ti panangipateg kanyana ti umili kas anak, kabsat, gayyem ken hukbo da. Kalpasan ti pannakapalaban ti yunit da Ka Brando, idi nakita da ti panangbastos ti AFP iti bangkay na, nagsawsaw-an da dagiti soldado. Ngem iti bangir ti panagladingit, napagil-ayab ti pannakatay ni Ka Brando ti mapanglaban a kapanunotan ti umili.

Silalagip ti Partido Komunista ti Pilipinas, Baro a Buyot ti Umili ken masa a pinili na a pagserbian. Ditoy puso mi, agtaltalinaed a sibibiag ni Ka Brando.

Saan a mapaay dagiti inarakop na a prinsipyo. Ti nagbuisan ti biag ni Ka Brando ken dadduma pay a martir ti rebolusyon a Pilipino. Sigurado a napipigsa a pukkaw ti pannakidangadang ti ipekta dagiti umili. Tapno gibusan ti agdama a sistema nga isu't mangirurumen ti umili a Pilipino. Tapno gun-oden ti pudno a demokrasya ken wayawayay! **B**

Panaglabsing ti 45IB iti linteg ti gubat

Kas ti gagangay a kagagalad ti pasista a tropa ti AFP, nagipasaknap ti panaglabsing iti Kumprehensibo a Katulagan iti Karbengan Tao ken Internasyunal a Makatao a Linteg dagiti tropa ti 45 IB. Iti uneg daytoy ti operasyon militar da iti San Mariano, Isabela.

Nakaengkwentro ti tim a nakaipaunegan ni Ka Brando ti 50 a soldado ti 45 IB "A" Coy ken elemento ti CAFGU iti Brgy. Buyasan, San Mariano iti bigat ti Marso 25, 2003. Idadauluan ni Lt. Alburo ti tropa dagiti kabusor. Adda pay nayon a tropa ti "B" Coy a simmuporta iti panangidaulo da Lt. Martinez ken Lt. Ayson.

Iti damo a bugso ti putukan, dagus a natamaan iti barukong ni Ka Brando. Imbes nga urnosen da ti bangkay na, tinagbat dagiti pasista a tropa ti ampit a braso ni Ka Brando. Pinagbayag da pay ti sumagmamano nga aldaw ti bangkay na sakbay nga inruar da.

Sakbay a pimmanaw dagiti soldado iti lugar ti labanan, nagpappaputok da iti aglawlaw. Nagbuteng dagiti masa a rimmuar iti balbalay ken pagtrabahoanda. Iti tunggal balay a malabsanda, tinakaw da dagiti taraken a manok dagiti masa.



Inaramat dagit militar kas trensera ti masa babaen ti panagummong kanyada agingga a makaruar da iti baryo. Namnamaen da a saan nga agpapatok ti NPA. Ammo da a bigbigbigen ti NPA ti makatao a linteg a saan a mangiraman kadagiti sibilyan agingga't mabalin.

Mamin-anon a daras a nilabsing ti AFP ti CAHRIHL. Mamin-ano met a darasen a pinaneknekan da nga isu da ket saan a para iti pagsayaatan ti umili ken pagilian. Pammaneknek ti pannakatay ni Ka Brando ken ti atiddog pay a listaan ti krimen da iti umili. **B**



Rebolusyonaryo nga Ina

Maadawan ti inspirasyon ti pakasaritaan ken kapadasan da Ka Lei ken Ka Anjie. No kasano da a sinango ti kontradiksyon iti bukod ti usapin ti panagpamilya. Iti panangpaaywan ti annak. Ken iti panangipangruna iti umili ken rebolusyon kas responsable ken naindaklan a nagannak

“INKEDDENG KO NGA AGSUBLIAK KALPASAN NGA AGANAK”

NI KA LEI

“Adda pay laeng iti tian ti sikog ko, inkeddeng mi nga agasawa nga ipaalaga kadagiti makaawat a kakabagyan mi. Ti pinanunot ko, no ania ti kabibiag dagiti agaywan kaniana, isu metten ti maimatangan na a biag. Kayat mi a simple ti panagbiag na tapno naas-asideg met laeng iti masa a pagserserbian ti kakadua.

Napanak iti baryo idi 10 nga aldaw sakbay ti panaganak ko. Sakbay daydiay, nagakemak latta ti trabaho kas opisyal medikal ken trabaho iti panagmentina ti kampo kabayatan ti pulong-panagadal.

Iti sidong dagiti kasapi ti Partido iti lokalidad, dagiti organisado a masa, ti naganakak. Isu da ti nagalaga kaniak bayat ti panagpapigsak. Maysa a bulan kalpasan ti panaganak ko, nagsubliakon iti yunit a nakapaunegak.

Pudno a narigat nga ibati ti anak. Ngem ti panagkitak, napateg ti bukod a pangngeddeng nga agsubli iti panagtignay kalpasan ti panaganak. Ken ti panagtalek iti masa a pangipaaywanan ti anak.

Ipatpateg ko unay ti anak ko. Ngem dayta a panangipateg ket impauneg ko iti pangkabuklan a panangipateg ko iti trabaho iti rebolusyon. No mapagserbiak ti nalawa nga umili a marigrigat, kapaset metten isuna iti dayta a panagserbik. Natalekak met iti panangaywan ti masa gapu ta ited da ti amin a panagdungngo da kas met ti panagdungngo da kadakami a Hukbo da.

Agpayso nga iti uneg ti bulok a gimong, ti ina ken anak ket agsina nga agsina duron ti kinarigat. Uray man no saan nga NPA ti maysa nga babai, kapilitan nga ibati na ti anak na no agbirok ti panggedan. Ti maysa nga ina nga NPA, ibati ken ipaaywan na ti anak na tapno sanguen ti panaglaban para iti nawaya a masakbayan.

Kadagiti ngarud talakayan kadagiti kakadua a kababaihan, mapagbibingayan mi ti panagkita kanaig ti panangpaaywan ti anak. Ti kuna ti maysa a kadua, “Makaya pay dagiti babbai nga agtrabaho iti sabali a pagilian nga ipaaywan ti annak da, bayat nga agtrabaho. Sitayo pay ngata a nadagdagsen ti pagrebbengan na iti rebolusyon ken armado a pannakidangadang?”

Inton dumakkel ti anak ko, pamulatan to ti masa ken dakami amin a kakadua tapno kakuyog min ton a mangmuli iti baro a gimong nga awan ton dagiti mananggundaway.”

“MAKAYA DAGITI KONTRADIKSYON A MASABAT ITI PANAGPAMILYA NO NAPAGSAGANAAN A NAIMBAG”

NI KA ANJIE

“Kas ti aniaman a trabaho ken pagrebbengan iti rebolusyon, masapul a pagsaganaan ti pang-ideolohiya a paset ti panagpamilya. Adayo ni lakay ko (nga NPA met laeng) idi inyinaw ko ken inyanak ko ti inauna mi. “Abnormal” daytoy no iti burges a pagrukodan ti panagpamilya, ngem kadatayo nga rebolusyonaryo, inawat ko daydiay kas paset ti panagrebolusyon.

Iti maikadua nga anak mi, nasabat ko a kontradiksyon iti bukod ko: ibatik kadin kadagiti agaywan uray no uppat a bulan na pay laeng? Nasakit ti riknak a panawan isuna. Dakkel ti presyur manipud iti pamilyak a saanak pay laeng nga agsubli tapno aywanak isuna, nga agsaksakit pay idi.

Ngem ti pinanunot ko, adu ti agur-uray a pagrebbengak iti uneg ti organisasyon ti Partido. Ken ti nalawa nga umili. Pinanunot ko a ti isusublik kadagiti kakadua ket para kanya na met laeng, para iti umili ken rebolusyon.

Napateg ti panagsagana iti panagpamilya. Ta no saan a nakasagana, adu dagiti suhetibismo iti bukod ken dagiti pangruar a salik kadatayo nga usapin a makapakapsut iti pangngeddeng nga ituloy ti panagrebolusyon. Ngem babaen ti tulong ti kolektibo tayo, ken iti inspirasyon ti nalawa nga umili, maringbawan tayo dagiti kontradiksyon.

Siyempre, ti tulbek ket ti natibker a kapanunotan. A saan tayo laeng nga ina ti impasngay tayo nga ubing, no di rebolusyonaryo nga agserserbi iti kaaduan.” **B**

Rigat ti ipaay ti HYV ken GMO

Napartuat dagitoy a bin-i saan a para kadagiti babassit a mannalon no di ket pagpespesan dagiti dadakkel a multinasyonal a korporasyon ti dakkel a ganansya



Idi damo nga inyam-ammo ti rehimen a Marcos ti High-yielding variety (HYV) ti mais ken pagay, kasla nakasaysayaat ti maited ti panangimula kadagitoy. Ti kuna da, ad-adu ti maapit ken napimpintas ti bunga dagitoy.

Ti kinapudno, inkampanya daytoy ti aso a rehimen iti uneg ti diktar ti imperyalismo nga US. Tapno maigumpo ditoy dagiti bin-i, abono, pestisidyo ken dadduma pay a produkto dagiti agrokemikal a transnayunal a korporasyon dagiti imperyalista. Manipud kadaytoy, makontrol da ti suplay ti yellow corn, mailansa ti presyo daytoy ken mailako dagiti produkto da.

Gapu ta awan met sabali nga ipautang dagiti usurero a bin-i no di yellow corn, simmaknap ti HYV a yellow corn a bin-i kas ti Planters idi ken Cargill a maus-usar agingga ita.

Kastoy met laeng ti gapu ti agdama a panangipasaknap da iti panagmula kadagiti GMO a bin-i. Nabayagen a maiparit iti sabali a pagilian dagitoy a bin-i, ngem ingumpo dagiti imperyalista iti Pilipinas tapno mapagkwartaan. Uray no makadadael ti salun-at ken aglawlaw, sige latta ti panangilako ti imperyalista a kumpanya ti Syngenta.

Nangato a gastos

Malaksid a maminsan laeng a henerasyon ti HYV ken GMO ti mabalin nga imula, narawet dagitoy iti abono ken pestisidyo.

Kitaen tayo ti maipasasaknap ita nga NK a bin-i. Nababbaba ti presyo na daytoy ngem ti HYV. Ngem, nakarkaro met ti didigra nga ipaay na iti mismo a biag ti ayup ken tao. Kadagiti kaso a nagadalan mainaig kadagiti lugar a nagusar ti NK, simmaknap ti panag-uban ken panagkalbo, panaggudgod, ken adda pay natay a nuang a nangan ti bulong ti nasao nga mula.

Nangato ti gastos ti panagmula ti yellow corn. Iti maysa a kaso ti mannalon a taga-So. Antigo, Yeban Norte, Benito Soliven, makagastos ti sumurok-kumurang P38,921 para iti 1.5 ektarya a daga, iti maysa a cropping. Nu makatama, agapit ti 130 a kaban ti yellow corn nga ilako na ti P6.30/kilo. Dumanon laeng ti inkam na iti P40,300, wenno P11.50 kada aldaw iti uneg ti tallo a bulan!

Ti maysa met a mannalon a taga-Brgy. Villaluz, Benito Soliven ket nakagastos ti P13, 337.50 para iti panagmula iti 1 ektarya a daga. Nakaapit laeng ti 36 a kaban a nailako



na ti P4.30/kilo. Kayat a sawen, dakdakkal ti nagastos na kumpara ti P7,740 a pastrek na.

Ikumpara tayo daytoy iti gastos para iti panagmula ti puraw a mais. Adayo a nababbaba ti magastos kumpara iti HYV a klase ti mais a maimula.

Pannakailumlom iti utang

Isu a kasingin met ti panangimula ti yellow corn ti pannakailumlom iti utang. Agtinnag daytoy iti pannakaguyod dagiti nuang ken dadduma pay a sanikua ti mannalon, pati ti daga. Wenno nakarkaro pay. Kitaen tayo ti pasamak ni Tessa a taga-Gattaran. Naibalud ket nagbagtit gapu iti kaadu't utang na iti usurero. Dagitoy ti kadawyan a pagtinnagan a kasasaad ti mannalon a saan a makabael a makabayad iti nangato nga utang.

Isu nga uray no bilang ad-adu ti maapit iti HYV wenno GMO a bin-i, dakdakkal met ti gastos a kasapulan para ditoy. Nayon a baklayen ti mannalon ti peggad iti salun-at ken biag gapu kadagiti sabidong iti uneg dagiti "milagro" kano a bin-i ti mula.

Agbaliw tayo ti imulmula!

Bassit ti kasapulan nga abono ti puraw a mais kumpara iti HYV ken Hybrid a mais. No nataba ti daga, saan pay ketdin a kasapulan nga abonoan daytoy. Maliklikan pay ti pannakadadael ti daga.

Iti Echague laengen, makita ti masa a nagresulta iti pannakadadael ti daga ti pinullo a tawen a panagusar da ti abono ken pestisidyo. Resulta daytoy ti panagmula ti yellow corn manipud pay maudi a paset ti dekada 70 sadiay. Ita, dumakdakkal ti kasapulan da nga abono ken pestisidyo. Ad-adu pay a pigsa't tegged ti dawaten ti panagdalus agsipud ta narigrigat a paksiaten dagiti ruot. Maiduron dagiti mannalon nga agusar kadagiti herbisidyo kas ti Power, a nakarkaro manen a makadadael ti daga.

Malaksid pay a makan ti pamilya tayo ti maapit a puraw a mais. Imbag laeng a pangsulnit nga iyapuy no agkirang ti makan. Kumpara iti yellow corn a saan met makan ti tao.

Kasayaatan nga maipasaknap manen ti panagmula kadagiti native a klase ti bin-i ti mais. Saan a daytoy ti makarisut ti nababa a presyo dagiti produkto, nangato a presyo iti pautang ken dadduma pay a pyudal ken mala-pyudal a pannakagundaway. Ngem addang daytoy iti panangpalukay ti kontrol ken panangpespes ti ganansya dagiti imperyalista ken kakumplot da iti biag ti nalawa a mayorya ti masa a mannalon. **B**



DAMDAMAG ITI CAGAYAN VALLEY

17 TROPA TI AFP, NATAY ITI AMBUS TI NPA-RPC

Naimballigian a nairussuat ti maysa nga ambus ti NPA iti Ueg, San Mariano, Isabela idi Marso 27 a nakatayan ti 17 a tropa ti AFP. Karaman iti natay iti AFP ti maysa a Major ken maysa a Tinyente. Adu pay ti sugatan.

Naggapu dagiti tropa ti kabusor iti Alibadabad, San Mariano. Agturong da koma iti surong ti San Mariano tapno suportaan ti tropa da a naengkuentro ti NPA iti Digusi, Buyasan idi Marso 25. Makalawas idin nga agop-operasyon ti kabusor.



PANIKTIK TI 45IB, DINUSA TI NPA

Dinusa ti NPA-RPC ni Ely Echore, taga-Casala, San Mariano, idi Marso 20. Intinnag ti Pangukuman ti Umili ti pannusa a patay kalpasan a napaneknekan dagiti kontra-rebolusyonaryo nga aktibidad na.

Ni Echore ket addaan utang a dara ken aktibo a paniktik ti AFP. Mangidadaulo daytoy ti kuraddog iti Bassit nga Ayos, San Mariano.

Ni Echore ket sigud a kameng ti NPA. Nangitaray ti maysa a paltog ti NPA ken nangisuko ti tallo pay.

Naggayd pay iti operasyon militar a nangkubkob iti puersa ti NPA iti Gayung-Gayong, Aga, Delfin Albano idi Agosto 24, 1999. Natay iti kubkob da Ka Mega, Ka Dayan ken Ka Raffy. Natay pay ti maysa a masa a nairaman iti kubkob.

NESTOR VELASCO, DINUSA TI NPA

Dinusa ti puersa ti NPA-Reynaldo Piñon Command ni Nestor Velasco, maysa a napeklan a kriminal ken kontra-rebolusyonaryo a taga-Gangalan, San Mariano idi maika-22 ti Abril. Napaneknekan ti korte a ni Nestor ket awan duadua a nangpatay iti maysa a mannalon, ni Dado Ampa idi Pebrero 16, 2002.

Ti pannusa ket immandar ti rebolusyonaryo a Pangukuman ti Umili ti Demokratiko a Gubyerno ti Umili kalpasan iti panagusig ti siyam a hues.

Insaklang ti masa iti lugar ti adu a kaso a panangpatay, gandat a panagrames, panagtakaw ti baboy ken nuang. Ken ti panagespiya kontra iti rebolusyonaryo a tignayan.

ANIBERSARYO TI BHB, RINAMBAKAN TI UMILI



Naimballigian a nairussuat ti selebrasyon ti maika-34 a tawen nga anibersaryo ti pannakaitakder ti Bagong Hukbong Bayan iti dua a larangan gerilya, iti Benito Tesorio Front ken iti Reynaldo Piñon Front idi Marso 29. Daytoy ket iti laksid ti operasyon militar ti AFP.

Ginasut nga umili ti dimmar-ay iti dua a panagrambak. Naggapu da kadagiti baryo iti uneg ti larangan, ken iti syudad ken ili. Nakirambak dagiti masa ken puerisa nga

agtigtignay iti intar dagiti mangmangged, agtutubo, estudyante ken mangmangged-pangkultura.

Nagpaduyakyak dagiti mangibagbagi ti Partido ken Hukbo. Nilagip ken napadayawan met dagiti martir nga NPA ken masa.

Nangibingay ti mensahe iti pannakirambak dagiti mangibagbagi ti ARMAS, RCTU, PKM, KM ken MAKIBAKA ken dadduma pay a bisita.

Nabiag dagiti rebolusyonaryo a presentasyon dagiti daniw, awit-galaw, kanta ken drama a nangiladawan iti agdama a kasasaad dagiti mannalon. Nalatak a presentasyon ti pabuya kanaig ti panangsuppiat dagiti mannalon iti panangagaw ti daga; ti kiddaw da a maibaba ti nangato nga interes iti utang ken panaglaban da tapno magun-od daytoy.

Ti anibersaryo ti Hukbo ket tinawen a paspasungadan ti umili. Uray no sadino ti pakairussuatan na, ken uray no madama ti operasyon, ipampamuspusan da nga isayangkat ken rambakan daytoy.

SUMAKSAKNAP A MILITARISASYON ITI CAGAYAN

Manipud Nobyembre 2002, saanen a nagsardeng ti 41 IB, kakuyog ti 51 Recon Coy, iti panangirussuat ti operasyon militar iti adu a barbaryo ti Alcala, Amulung, Baggao ken Gattaran. Agtultuloy met ti AFP iti puersado a panagrekrut ti CAGU, ken panagarmas kadagiti Bantay Bayan. Agsansanay dagiti elemento ti CAGU iti kampo ti 41 IB iti Burubor, Lallo. Parabantay met ti 77 IB ti 1,000 ektarya a nursery ti kamoteng-kahoy iti Lallo a saklaw ti panagpamula ti kumplot a Dy-Cojuangco.

Dagiti masansan ken nasaknap nga operasyon ti AFP ket nagresultan iti adu a kaso ti panaglabsing iti karbengan kas tao dagiti umili kadagiti apektado a lugar. Binugbog da dagiti Agay iti Capissayan Norte, Gattaran. Malaksid pay a puersado da a pinaggayd ti operasyon ti maysa pay nga Aggay nga agnagan ti Kaling. Uppat a sibilyan ti nasugatan iti pinabettak a granada ti 41 IB "B" Coy iti Bitag Grande, Baggao idi Marso.



CARAVAN ITI INTERNATIONAL EARTH DAY, NAANGAY

Maysa a protest caravan manipud iti Ilagan, Isabela agturong ti Gamu, Naguilian, Benito Soliven, San Mariano, Reina Mercedes, Cauayan, Alicia, Echague ken Santiago City, ti indauluan ti Diocese of Ilagan kas panangselebrar ti International Earth Day idi April 25. Sinuportaran daytoy ti nadumaduma a progresibo nga organisasyon kas ti DANGGAYAN, DAGAMI, Anakbayan ken dadduma pay.

Iti paduyakyak ni Fr. Greg Uanan, Director ti Social Action Center ti Diocese of Ilagan, indeklara na nga “Aldaw daytoy laban kadagiti proyekto a makadadael ti aglawlaw.” Indatag na dagiti proyekto a coal mining, panagpamula ti kasaba ken panangipamula ti BtCorn kas pagarigan. Kasta met a tinalmegan na dagiti dakes nga epekto ti BtCorn a makadadael ti salun-at ti umili ken aglawlaw. “Nayon pay a makadadael ti aglawlaw ti nasaknap a panag-logging dagiti dadakkel a kumpanya ti troso,” kunana.

3 NGA ESTUDYANTE TI PUP, HINARAS TI PNP-QUEZON

Hinaras ti PNP-Quezon, Isabela idi Abril 21 ti tallo nga estudyante ti Polytechnic University of the Philippines (PUP) a nakipagindeg kadagiti mannalon iti lugar a sakop ti kasaba sadiay Quezon, Isabela.

Dagiti naaresto ken naharas ket da Katrina Cenidoza, Rowena Bautista ken Shayne Medallo. Makipagindeg da kadagiti mannalon iti lugar tapno mangisayangkat ti panagsukisok iti lugar ken maammuan ti kasasaad dagiti mannalon kanaig ti pannakaagaw ti dagdaga da nga agserbi iti kasaba. Paset daytoy ti kurso da iti sosyolohiya.

Idi damo, pinilit nga inlugar ti 2 a pulis nga agnagan ti Infante ken Oscar Abrogena dagiti estudyante iti mobile patrol a lugan. Kalpasan a nagkedked dagiti estudyante a lumugan, nangayab da ti traysikel a nagsakayan da a napan iti PNP detachment. Ininteroga da ida iti uneg ti nasurok 2 oras. Pilit da nga ipapaaklon kadagiti estudyante nga isuda ket kameng ti NPA. Binutbuteng, nagsawsaw-an ken inalalan da ti retrato dagiti estudyante a kasla kriminal a naaresto no pay saan a nalawag nga adda kaso da.

TARIPNONG TI DAGAMI-JONES, RINIRIBUK TI 45 IB!

Irussuat koma dagiti kameng ti DAGAMI-Jones ti asembliya da idi Abril 13 iti Sta. Isabel, Jones. Pagtungtongan da ti irussuat da nga addangen mainaig iti kampanya a panangibaba ti interes ti pautang ken panangpunas iti panangsuitik dagiti buyer kadakuada. Ngem immuna iti lugar dagiti soldado ti 45IB. Hinaras ken binutbuteng da dagiti mannalon ken inikkat da dagiti istrimer. Pilit nga impaaklon da nga NPA ti nangpaayab ti pulong. Tinutukan da ti armalayt ni Melencio Descalzo, mannalon a taga-Sta. Isabel, Jones ken lider ti DAGAMI-Jones.

Kinondenar a dagus ni Benito Descalzo, tagapagsarita ti DAGAMI-Jones, ti pasamak. Imbulgar na ti panangrribuk dagiti tropa ti AFP. Imbutaktak na daytoy kas “addang tapno lapdan ti nainkalintegan a dawat dagiti mannalon iti Jones iti panangibaba ti interes ti pautang”. Kuna pay ni Descalzo, “Saan laeng met nga NPA ti addaan kabaelan na a lumaban. Kabaelan mi nga ilaban ti karbengan mi!”

RALI KONTRA ITI GYERA, INRUSSUAT DAGITI TAO TI SIMBAAN

Karaman dagiti tao ti simbaan iti lumawlaw a panagtignay kontra iti irusrussuat ti US a gyera iti Iraq. Insayangkat ti nasurok 300 a padi, madre, ministro ken delegasyon manipud kadagiti parokya, iskuelaan, ken adu nga organisasyon ti maysa a tignay protesta iti Cauayan City idi Marso 1.

Indauluan da Bishop Sergio Utleg ti Simbaan a Romano Katoliko, Bishop Alex Wandag ti simbaan nga Episkopal ken Bishop Eulogio Pandongan ti Iglesia Filipina Independiente (IFI) ti nasao a rali.

Daytoy ti kaunaan nga aktibidad nga ekumenikal nga inrussuat ti innem a denominasyon a Kristiyano. Dagiti limmaok a simbaan ket ti Simbaan a Romano Katoliko-Diosesis ti Ilagan, Simbaan nga Episkopal-Diosesis ti Santiago, Simbaan nga IFI-Diosesis ti Santiago, United Methodist Church, United Church of Christ of the Philippines ken ti Salvation Army.

Inawit ti tignay protesta ti tema a: “Buklen ti panagkaykaysa nga ekumenikal para iti hustisya ken kappia!”

Sakbay ti martsa, nangirussuat da ti panagbasa ti Bibliya, a sinaruno ti panangibingay ti mensahe da Obispo Utleg ken Obispo Wandag. Naisayangkat pay ti *patpong* ti panagprotesta. Nagsala dagiti tao ti simbaan nga awit-awit da dagiti placard da.

Idi nagmartsa dan, binangenan dagiti kameng ti pulisya ti delegasyon dagiti progresibo nga organisasyon kas ti DAGAMI, BAYAN ken BAYAN-MUNA. Innala da dagiti strimer ken plakard da. Dagus a kinondenar dagiti daulo ti simbaan daytoy.

KONGRESMAN UY, LIPLIPITEN NI DY KEN RESPICIO

Kumarkaro ti panangliplipit ti dynastiya a Dy kadagiti kumalkalaban kadaytoy iti pulitika. Sinampaan da manen ti baro a kaso ni Congressman Edwin Uy ti maikadua a distrito ti Isabela idi Marso 12 iti Ombudsman.

Kuna ni Bise-Gobernador Respicio, linabsing kano ni Uy ti Sec. 88, 89 ng P.D. 1445 at COA circular number 97-002. Mainaig kano daytoy iti salary cash advance ni Uy a P193,000.50 iti laksid ti saan pay a nalikida a nairuar na a kuarta a P100,000. Inruar na dagitoy a kuarta idi kina-bise gobernador na pay laeng iti probinsya.

Daytoy ti maikadua a kaso ti gubyerno ti probinsya iti Ombudsman. Immunan a sinungbatan ni Cong. Uy dagitoy a panangliplipit ti bunggoy da Dy ken Respicio. Kinuna na, “nasapa unay a panagpulitika”.

“Saanak pay met a nagdeklara nga agtaray iti kinagobernador inton 2004,” kuna ni Cong. Uy. Innayon na pay nga adda pakainaigan daytoy a panangliplipit iti nairut a panagsuporta ni Cong. Uy iti panagtignay dagiti mangmangged iti sektor ti salun-at nga indauluan ti Alliance of Health Workers. Kinondenar pay ni Cong. Uy ti panangpaserra ni Gov. Dy iti 10 nga ospital iti Isabela idi Abril 2002.

GOB. DY, NINAGANAN NI OBISPO VILLENA A SUPORTER TI HUETENG

Ninaganan ni Obispo Ramon Villena ti Diosesis ti Bayombong ni Isabela Gov. Junior Dy a sumupsuporta ken mangim-impluwensya iti panagsaknap manen ti hueteng iti sumagmamano nga ili ti Nueva Vizcaya. Malagip nga ipampannakkel dagiti opisyal ti lokal a gobyerno kem simbaan a Katoliko nga awanen ti hueteng iti probinsya iti naglabas a dua a tawen.

Kinuna ni Obispo, inimpluwensyaan ni Gob. Dy dagiti opisyaales ti PNP - Nueva Vizcaya a palubusan ti operasyon ti hueteng. Impaduyakyak na pay a ni P/Supt. Jesus Manubay, PNP Provincial Director ket nalaka a maawis da Dy. Inkari ni Obispo a saanen nga agbayag iti serbisyo ti kapada ni Manubay.

Naireport a nasaknap ti operasyon ti hueteng kadagiti ili ti Solano, Bagabag ken Bayombong.

Kabayatanna, pagad-adalan ni Dy ti panangidarum kenni Obispo iti kaso a libelo. Ni SP Ismael Atienza, maysa a natalek nga asu-aso ti pamilya Dy ket nagdeklara a mangipasa ti resolusyon iti Sangguniang Panlalawigan tapno kondenaren ti paduyakyak ti Obispo.

Ni Dy ti mabigbig a mangkonkontrol iti hueteng kadagiti probinsya ti Isabela ken Quirino. **B**

Ka Neneng

Ni Ka Dey Layag

Saanak a naasideg iti ubbing. Manipud ngamin kaubing ko, saanak a nasanay nga adda ubbing a makakuyog. Ngem ita, kanaig ti maysa nga ubing ti kayat ko nga istoryaen. Neneng ti nagan na.

Bimmisita ni Neneng iti uneg ti sona a gerilya a pagtigtignayak. Binisita na ti nanang ken tatang na a mannakigubat ti NPA. Ken ti dadduma pay a kapamilya ken gagayyem na a kameng ti Hukbo.

Nadutukan nak ti kolektibo mi a mangisuro iti rebolusyonaryo a panagaadal kenni Neneng ken ti dadduma pay a pada na nga ubbing a masa. Sus, nagproblemanak tuloy! Kasanok a maipaawat kanya da ti kanaig ti imperyalismo? Ti pyudalismo? Ti Burukrata Kapitalismo? Ti kinapateg ti pannakidangadang a nilaukan ti nagannak na, ken ti adu pay nga umili?

Nagay-ayam kami. Nakita mi ti panangadipen dagiti nangsakup iti pagilian, kadagiti appo tayo a Pilipino. Inistoryak kanyada ti kanaig ti maysa nga “al-alia”: Uncle Sam ti nagan na, mangpespespes isuna ti kinabaknang ti pagilian. Adda dagiti taw-an na a dadakkel ti pangil na, atiddog ti kuko da. Kadagiti istorya mi, ni Uncle Sam ti kontrabida:

*Innala na,
tinakaw na
ti daga dagiti masa!*



Syempre, nu adda kontrabida, adda bida. Da nanang ken tatang na, dakami nga NPA, ken dagiti marigrigat nga umili— datayo ti bida! Isu nga idi nagsao da iti sango ti kakadua, kastoy ti naibingay ni Ka Neneng:

“Maawatakon no apay a simmampa ni Tatang ken Nanang ko. Kayat da a salakniban dagiti marigrigat. Isubli da kadagiti umili ti tinakaw ni Uncle Sam a kinabaknang ”

Kayat da kadi met a sumampa no dumakkel da, kas kenni Tatang ken Nanang?, damag ko. “Wen!,” ti nagkaykaysa a sungbat dagiti ubbing a kakadua.

Kunak laeng no narigat a makaawat ti ubbing. Ngem no maminsan, nalaklaka da pay a makaawat ngem datayo a nataengan. Maawatan da ti dakes ken nasayaat. Ti bida ken kontrabida, ti



manggungundaway ken magungundawayan, ti umili a Pilipino ken ti Imperyalista a ni Uncle Sam. Pinasimple a panangiladawan ti risiris dagiti dasig, panangitandudo ti rebolusyon, ken panagserbi iti umili.

Kalpasan ti panagadal mi, nasursuro dagiti ubbing ti maysa a daniw:

*Kumusta nanang, kumusta tatang,
Na-mis ko po kayo!
Ihele n'yo akong muli sa inyong
Malaki at malakas na bisig.*

*Bata pa ako, maliit pa nga
Parang hindi makaintindi, hindi makaunawa
Ang alam lang ay maglaro, tumawa
Pero nandito ako, nanang, tatang!*

*Buti na lang! Dito ako dinala
Nakita ko kayo, kakadua
Huwag mag-alala, kami'y nakakaunawa
Hanggang sa muling pagkikita, kadua!*

Ni Ka Dey ket maysa a kassampa a mannakigubat ti NPA, naggapu iti sektor ti kabataan-estudyante.

TANO

